

繡刻綵毫

記定本

目錄

第一齣 敷演家門

第二齣 夫妻翫賞

第三齣 仙翁指教

第四齣 散財結客

第五齣 湘娥訪道

第六齣 爲國薦賢

第七齣 頒詔雲夢

第八齣 別妻赴京

第九齣 拜官供奉

第十齣 長安豪飲

第十一齣 預識汾陽

第十二齣 湘娥思憶

第十三齣 脫靴捧硯

第十四齣 祿山謀逆

第十五齣 游翫月宮

第十六齣 宮禁生讒

第十七齣 知幾引退

第十八齣 祖餞都門

第十九齣 母子慮禍

第二十齣 乘醉騎驢

第二十一齣 歸隱林泉

第二十二齣 漁陽鼙鼓

第二十三齣 海青死節

第二十四齣

訪道仙翁

第二十五齣

永王設計

第二十六齣

泛舟采石

第二十七齣

誓死不從

第二十八齣

展叟單騎

第二十九齣

展武相逢

第三十齣

救主出圍

第三十一齣

難中相會

第三十二齣

官兵大捷

第三十三齣

羅襪爭奇

第三十四齣

蓬萊傳信

第三十五齣

廬山受枉

第三十六齣 遠謫夜郎

第三十七齣 妻子哭別

第三十八齣 仙官列奏

第三十九齣 他鄉持正

第四十齣 汾陽報恩

第四十一齣 欽取回朝

第四十二齣 團圓受詔

綵毫記

明屠隆著

第一齣 敷演家門

〔末上〕高人妙理通絃索。

換羽移宮且爲樂。

請看水底一燈明。

照見蓮花都不着。

〔滿庭芳〕灑落天才。昂藏俠骨。風流千古青蓮。萬金到手。一日散如煙。許氏清虛慕道。與夫君同隸神仙。官供奉淋漓詩酒。傲睨至尊前。名花邀綵筆。遭讒去國。湖海飄然。正遇永王構逆。抗節迍邐。豪士挺身救難。賴汾陽叩闕陳冤。金雞赦。還鄉復爵。夫婦得重圓。

高常侍含沙妒寵。

郭令公納爵酬恩。

許夫人采真洞府。

李供奉大隱金門。

第二齣 夫妻翫賞

〔破齊陣〕〔生上〕寶劍秋呼風雨。綵毫夜飲虹霓。名擅雕龍。詩成倚馬。清思裁雲翦水。未杼天外冥鴻翅。且養山中隱豹姿。男兒生自奇。

天才磊落自髫年。斗酒淋漓詩百篇。佛果前身號金粟。仙姿現世是青蓮。小生李白。字太白。隴西成紀人也。梁武昭王勗九世文孫。太夫人誕白時。長庚入夢。人言是太白星精。學富珠璣。倒神女之三峽。文成雲錦。奪天孫之七襄。清狂玩世。自負王佐帝師。瀟灑出塵。人擬仙風道骨。搖筆而出語驚人。果然不食煙火。策杖而尋幽避俗。生來雅志山林。家本西秦。習五陵之豪俠。客遊南楚。愛七澤之汪洋。相國許公。妻以孫女。名喚湘娥。揚鸞飛鳳。謾誇水月精神。控鶴乘雲。亦有烟霞氣韻。小生宿隸神霄。乃伯陽之苗裔。荆妻舊侍王母。儻飛瓊之後身。各無心於香奩。恥懷繾綣。並栖情於石室。渴慕清虛。今日日朗風和。值芳春之淑景。沙明水碧。當荆楚之歲時。不免請娘子玩賞則個。〔請介正旦扮許湘娥帶侍女上〕

〔花心動〕紫閣青閨理靚粧。好把羅衣初試。嫩草抽茵。新柳垂絲。嬌鶯啼上花枝。春山不及修眉好。問小鬟粉黛還宜。〔合〕向雕闌畫檻。尋芳拾翠。〔相見介生〕

娘子時屆韶華。家臨雲夢。你看雲山重疊。時時鳥度屏風。烟水澄鮮。箇箇魚遊寶鏡。瑤瑟泠泠。波上時來帝子。朱旗獵獵。雲中恍睹荆王。牙檣錦纜。齊飛白浪長天。畫閣朱簾。盡捲紅霞暮雨。真個好一派烟波光景也。我和娘子玩賞片時。卻不是好。〔旦〕正該如此。侍兒們將酒過來。

〔集賢賓〕〔生〕春來雲夢天似水。水邊樓閣參差。十二雕闌霞散綺。看萬頃微茫無際。鷗飛鷺起。映兩岸青蘋白芷。〔合〕圖畫裏。人盡在琉璃寶地。

〔前腔〕〔旦〕袂服新粧春自理。菱花冷侵漣漪。七澤三湘辭賦美。喜得婿相如可比。峽雲巫雨。羞說起高唐風致。〔合前〕。

〔琥珀貓兒墜〕〔生〕素書黃石。進履圯橋時。謝傅東山雅自期。白雲明月是心知。〔合〕栖遲洞口。春深幾度薔薇。

〔前腔〕〔旦〕錦心繡口。下筆太淋漓。才子風流世所稀。時來應作帝王師。〔合前〕官人。妾雖身居閨闈。性帶烟霞。雅慕長生。願希度世。聞廬山女道士李騰空。得金液還丹之術。服炁辟穀。出神飛形。妾身欲攜女使一二。裹糧訪之山中。叩求大道。未審官人。意下如何。〔生〕男子得道。

隸籍木公。女子成眞。列名金母。自古有之。娘子宿占仙班。生有道氣。騰空女子。何妨采眞。卑人當作詩送行也。〔旦〕多謝官人。又有一事奉告。妾家有薄產數十萬金在揚州。多年不曾經理。意欲煩你一行。尊意肯否。〔生〕廣陵天下佳麗。龍舟帳殿。有煬帝行宮。二十四橋。烟花無恙。卑人正欲一往遊覽。〔旦〕如此甚好。明日打點行李。先送官人東遊。妾乃西行訪道也。

〔簇御林〕〔生〕行宮廢。帳殿移。御堤荒。煙草迷。江都絲管依然沸。傍朱樓。且取金樽醉。〔合〕謾淒其。河橋明日分手各天涯。

〔前腔〕丹霞畔。碧水湄。訪仙蹤。拜女師。玉清金箭玄言祕。餌飛虹。一粒堪遺世。〔合前〕

勞歌一曲解行舟。

人自傷心水自流。

煬帝行宮何處是。

烟花三月下揚州。

第三齣 仙翁指教

〔夜行船〕〔外扮司馬子微上〕家在天台華頂上。丹臺名姓。煙霞骨相。碧落千尋。

紅霞百丈。聽一派僊音嘹唳。金幢繡柱。響旂鈴。帝許名山住福庭。頂上真人時出現。夜深朗誦蕊珠經。貧道覆姓司馬。名承禎。字子微。洛州溫邑人也。名藏丹室。佩清華大洞之章。身居赤城。傍桐柏真人之府。道高於都水監。拜敕玉霄峯頂。位列於東華君。承恩紫極宮前。隴西李白。原是天上星官。謫居塵世。才華絕代。風骨超羣。貧道慮其纏緜婚宦。迷卻宿緣。終墮落於人間。何由再返於天界。今日此人東遊維揚。道經江陵。不免與之相見。點化他一番。遠遠望見李太白來也。〔生帶從人隨上〕

〔前腔〕白浪黏天浮畫舫。雲飄零亂。沙鷗下上。霞氣初澄。遙空更敞。雅稱我芒鞋竹杖。〔相見介外〕李先生稽首。〔生〕仙翁拜揖。念小生與仙翁素乏平生。何以見顧。〔外〕貧道偶見先生仙風道骨。可與神遊八極之表。故爾邂逅。欽注高風。〔生〕多謝弘獎。非所敢當。請問仙翁高姓大名。〔外〕貧道乃天台山隱者。司馬承禎是也。〔生致敬科〕呀。原來是子微先生。道高河上。名在丹臺。凡夫得遇真人。三生至幸。小生進則欲經邦濟世。小建麟閣之助。退則欲學道栖真。早證神仙之位。不知此生緣分如何。望真人指教。〔外〕天機秘密。難盡宣言。子既是神仙中人。不妨洩露。足下

此行不久當遭逢明主。列職清華。須慎筆端。應防讒口。暫爾揚名天闕。終當浪迹江湖。須要外示放曠。內寶靈明。必能返轡上清。逍遙碧落。此外非貧道所知也。〔生下拜科〕多謝尊師指教。使白如撥雲霧而睹青天。願終身佩服明訓。

〔北雙調新水令〕〔生〕仙人偶下白雲鄉。駐飊車清言半餉。松搖晴露滴。蘋挾水風香。心地清涼。似身世遊蓬閬。

〔南風入松慢〕〔外〕知君舊籍隸虛皇。列近侍班行。謫來塵土離仙仗。美才華綵筆寫琳琅。瞥然見杲日風神秀朗。好和你超八極。共翱翔。

〔北水仙子〕〔生〕念小生呵。少年流落在荆湘。西望傷心隴樹長。一編十載栖林莽。堪嘆我命雖艱。心自壯。也只得附絲蘿相府東牀。俺待要匡社稷。扶王霸。希謝安。學子房。回首覓不死仙方。

〔北折桂令〕〔外〕你元是紫府仙郎。暫被謫清都無恙。你且去近侍君王。准被着簪筆彤墀。含香畫省。起草明光。切莫弄酒盃落拓。詩賦清狂。也須知如簧可

畏。貝錦難防。有一日。鼙鼓動漁陽。冠蓋走蒼茫。那時節。早歸洞府。急備資糧。

〔清江引〕〔合〕今朝握手江湖上。勸蚤晚拋塵網。朱顏暗裏銷。白髮愁中長。你看今古英雄俱宿莽。〔外〕今日一會。宿世良緣。吾子前途保重。貧道辭別去也。〔生〕多謝仙翁指教。他日相訪於天台石梁。幸無相忘也。

〔外〕邂逅相逢亦宿緣。

〔生〕仙都重會是何年。

〔合〕分明說破前生事。

一夢長庚豈偶然。

第四齣 散財結客

〔小外扮武謬上〕腰間湛盧劍。頭上縵胡纓。救難滅蹤跡。殺人留姓名。自家姓武。名謬。排行十七。東吳人氏。避地江都。膽氣絕人。豪俠好義。生平有一大讎人。被我一劍行誅。又有一大恩人。不是千金難報。聞隴西李太白。高才尙義。結客捐金。昨日取醉平康。六院諸姬。齊來相見。競以輕綃練裙。求其詩賦。太白乘醉落筆。手不停揮。各有贈篇。瀟灑清妙。臨去悉厚贈金帛。日散萬金。我不免去一見此人。果是如何。〔小生扮員半千上〕興到文藻飛。飢來顏色槁。吟成百篇詩。不能易一飽。自家員半千。

高才流落。寓住維揚。聞李太白一代才子。輕財重義。不免去訪他。求他一濟。〔丑扮張光乍上〕朝從都市遊。暮向娼樓宿。身上着羅衣。家中無半粟。自家揚州城中一個浪子。名喚張光乍。家無活計。花酒爲主。少年場中。風流有數。昨日與人賭輸萬貫錢。無從措處。聞此間有個李太白。仗義疎財。極肯交結好漢。不免去走一遭。〔占扮柳條青上〕少年生深閨。逢人便掩面。今日走路傍。哀哀淚如線。妾身乃揚州城中女子。柳條青。父親柳宿。薄宦倉曹。逋欠官糧。追賠禁獄。妾欲賣身救父。一時未得便成。聞此間有一個李相公仗義。專一憐貧恤苦。不免含羞去見他一面。〔丑〕列位想都是要見李太白先生的。求門上通報。大家進見。〔通報介生上末淨從人同上〕

〔西地錦〕〔生〕潮滿江心放棹。月明橋上吹簫。五陵結客方年少。千金于我鴻毛。門外何人。〔末〕稟上相公。門外有四位客人相訪。〔生〕請進來。〔並進見介生〕四位何來。各請道名姓。〔小外〕小子姓武。名騫。排行十七。東吳人氏。〔小生〕小生姓員。名半千。頗善詩賦。〔丑〕小子姓張。名光乍。少年場中。有名子弟。〔生〕這一位小娘子何人。〔占〕妾身姓柳。名條青。乃司倉柳宿之女。父親有難。求見相公。〔生〕請列位見教。下顧爲何。〔小外〕小子生平豪俠。有大難人。業已一劍行誅。又

有一大恩人。思得千金爲報。聞先生輕財重義。特爾相投。倘蒙慨然。吾事畢矣。〔出人頭介〕仇人頭顱。現在此。〔生〕這個沒憑據。焉知真假。〔小外怒起介〕我武十七好漢。怎肯欺人。既爲小人所疑。合當速去。〔生挽科〕烈士不欺人。小人無知。豪傑不必介懷。左右快取千金爲贈。〔小外〕如此多謝。〔生指小生〕此位有何見教。〔小生〕念小生結髮讀書。頗工辭賦。屢舉不第。流落江湖。飢寒困苦。世無郭元振。故敢告急足下。〔生〕僕亦久聞員君大名。願虛懷請教。適纔武十七說報讎殺人。事亦大奇。求君見教一篇。〔小生〕領命。〔沈吟介〕古人好俠烈。其事多咨且。荆卿西入秦。乃與舞陽俱。意氣豈不壯。劍術何其疎。副車中徒爾。空衣斬亦虛。夫君運奇節。長嘯起雄圖。赤雷閃寶劍。清霜泣頭顱。義聲振天地。成功祗須臾。激昂千載下。永爲壯士模。〔生〕奇哉。矢口成篇。雄壯激烈。真才子也。左右快取千金爲員先生壽。〔小生〕多謝。〔生指丑〕此位有何見教。〔丑〕小子無賴。昨與博徒賭輸萬貫。求相公見助。相公倘要往平康取樂。小子最善幫閒。〔生〕左右取萬貫送此人。〔丑〕多謝。〔生〕小娘子爲何事而來。〔占〕妾父薄宦。逋欠官糧。監追在獄。妾身意欲自鬻救父。一時未有因緣。望相公垂憐。救拔苦難。〔生〕娘子言之良苦。不知你所須幾何。〔占〕得五百金足矣。〔生〕左右發五百金。贈這

小娘子〔小外〕李公高義。足冠千古。我四人一同拜謝。

〔駐雲飛〕千古人豪。義氣稜層五岳高。日角揚奇表。天藻藏靈竅。嚙金帛等秋毫。垂憐無告。救困扶危。功德標穹昊。定擬仙班地位超。

〔前腔〕〔生〕浪迹萍飄。一片雄心久不消。重義輕金寶。結客連燕趙。嚙癖性愛錢刀。王戎和嶠。長物浮雲。不散還須耗。留取花生五色毫。

〔衆〕散財結客不言恩。

天下飢寒盡在門。

隻手一揮三十萬。

定應功德奏天闕。

第五齣 湘娥訪道

〔外扮展靈旗上〕火輪電甲衛清都。使酒天門偶大呼。卻被雷師糾不法。候家聊罰作人奴。某許相國府中老蒼頭。展靈旗是也。與崑崙奴俱是天上九關守將。偶乘醉使氣。兩人大鬧天門。一時同謫。崑崙奴在崔千牛家。我展靈旗在許相國家。做一個給使。忠心報主。武勇超羣。我家小姐往廬山訪李仙結菴處。小姐車兒早到也。〔旦道扮乘車占扮步搖隨上〕

〔卜算子〕〔旦〕門邊碧溪灣。路出青天半。茆菴只在白雲間。一派簫聲遠。〔外〕

稟小姐。此處已是廬山李尊師隱居。請小姐停車。〔旦〕老蒼頭先入通報求見。〔外跪稟介〕稟上尊師。荆楚許相國孫女。秀士李白妻許氏。遠來訪道。求見尊師。〔內叫〕此間沒有仙人。無道可訪。不勞相見。〔外〕稟小姐。菴內人說沒有仙人。不肯相見。〔旦〕待我親求。〔跪介〕妾身乃相國許公孫女。秀士李白妻。許氏湘娥。久慕玄風。千里拜訪。乞尊師念弟子遠來至情。俯容一見。〔內應〕仙師出來也。〔老旦扮李騰空丑扮侍女上〕

〔前腔〕絳雪駐容顏。紫霧騰霄漢。蕊珠一卷掩松關。石几爐香滿。授訣扶桑大帝君。曾窺丹檢綠韜文。曉來控鶴朝真去。不帶青天一片雲。自家女真李騰空是也。門外何人至此。〔旦〕賤妾許氏。託體相門。猥以凡胎。渴慕大道。遠來參訪。願度迷津。〔稽首拜介老旦〕女娘請起。念貧道山野村姑。隱居避世。有何道術。敢勞軒車。〔旦〕尊師深居名山。籍登天闕。延年度世。出神飛形。無勞過謙。願垂慈憫。〔老旦〕女娘生居華屋。志慕清虛。道骨天成。登真可冀。你聽我道來。

〔北二犯江兒水〕流星飛電。人世是流星飛電。榮華纔轉眼。似車輪下坂弩箭。

離弦撇香閨。尋仙館。竹色暗紅泉。松聲出紫烟。龍起瑤天。鶴下瓊田。鎮日價泛滄溟。遊閬苑。〔旦〕聞言爽然。灑涼颺。聞言爽然。清都別院。喜來到清都別院。早不覺白泠泠。凡骨頓僊。凡骨頓僊。

〔前腔〕〔旦〕繁華庭院。生長在繁華庭院。香奩珠翠滿。厭修眉蟬鬢。寶鬘花鈿。也明知時光短。因此叩靈壇。齋心禮上仙。手啟霞編。口授真詮。我自願侍龍車。陪鳳輦。〔老旦〕知卿有緣。宿生來知卿有緣。紅塵不戀。受清虛紅塵不戀。請看那仙都裏桃熟幾番。桃熟幾番。

〔北寄生草〕〔老旦〕調鉛粉。勻顏色。美容華。正少年。秀眉好。目流清盼。金釵鬟墮連珠串。輕綃縹緲搖紈扇。只解道喜時六幅翠裙長。又誰知悲來三尺紅羅短。

〔前腔〕庭前樹。生連理。錦中花。栽合歡。爭妍妬寵真堪歎。趙姬入殿班姬遠。楊妃薦寢梅妃怨。卻纔的鳳皇臺上聽笙簫。早又奈鴛鴦塚畔悲笳管。〔旦〕多謝尊